



Inatsisartunut ilaasortaq Kristian Jeremiassen, Siumut  
/her

**Aasianni GU-imi imigassanik aalakoornartortalinnik eqqusseqqusinnginnermut atorunnaarsitsinissamut Naalakkersuisunut ilaasortaq akuliunniarner-soq pillugu § 37 tunngavigalugu apeqquteqaammut akissuteqaat 2012/47**

Asasara Kristian Jeremiassen

1. marts 2012  
Sagsnr. 2012-062725  
Dok. Nr. 840622

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: iin@nanoq.gl  
www.nanoq.gl

Aasianni GU-imi imigassanik aalakoornartortalinnik eqqusseqqusinnginnermut atorunnaarsitsinissamut Naalakkersuisunut ilaasortatut akuliunniarner-sunga apeqquteqaateqarfigivarma. Apeqquteqarninni paasivara isumaqartutit ilinniartut 18-t sinnerlugit ukiullit imigassanik aalakoornartulinnik inigisaminni pigisaqar-sinaallutillu imersinnaanissaannik akuerineqassasut.

Aallaqqaasiutigalugu pissutsinut tamakkununnga tunngatillugu oqaatigineqas-saaq ilinniartut ilinniarnerminni inigisaminnut akiliuteqartarmata, maluginiarta-riaqartorli tassa ilinniartut inaat tassaammata ilinniartut ilinniarnerminnik naammassinnissinnaanissaat siunertaralugu Namminersorlutik Oqartussanit im-mikkut ittunik atuagassinneqarnermikkut inigissaat, aammalu ilinniakkaminnut atatillugu inigisatik ilinniagaqarner-siutimik ilaannik annertunerusumik akiler-tarmassuk. Tamatumunnga atatillugu oqaatigineqartariaqarpoq ilinniagaqarner-siutit annertussusaannut naleqqiullugu inigisamut akiliutigineqartartup annertus-susaa qanoq atuagassaqaartinneqarnerinut sunniuteqartinneqanngimmat, tamatu-munnga atatillugu inigisami uumasuuteqarneq, pujortartarneq imigassanillu aa-lakoornartortalinnik atuinernut atatillugu. Matumanilu inigisamut akiliutip anner-tussusiata attartortitsisup ilinniartut inaanni ineqarnermut piumasaaqateqartaria-qannginneranut, tassunga ilanngullugu malittarisassanik aalajangersaanissamut, tunngavilersuutitut atorneqarnissaa tulluartuunngilaq.

Aasianni GU-mi imigassanik aalakoornartunik atuinissamut inerteqquteqarner-mut inatsisinut tunngavigineqartunut tunngatillugu ilisimatitsissutigineqassaaq ilinniartut inaannik ingerlatsisut ataasiakkaat namminneerlutik malittarisassanik pilersitsisarmata, tak. Ilinniartut ineqarfii pillugit Namminersornerullutik Oqar-tussat nalunaarutaanni nr. 18, 1. november 2007-imeersumi § 6 imm. 2. Tassani takuneqarsinnaavoq malittarisassat imigassanik aalakoornartulinnik atuinernut, avataaniit tikeraateqarnermut, eqqiaanernut assigisaannullu tunngasunik imaqaar-sinnaasut. taamaalilluni inatsisini allaqqavoq ilinniartut inaannik ingerlatsisut ataasiakkaat ilinniartut inaannut ingerlataminnut ataasiakkaanut tunngatillugu malittarisassat ilinniartut inaanni pineqartuni atuuttussat qanoq imaqaassanersut

aalajangersaasinnaasut. Aasianni GU-mi inatsit taanna tunngavigalugu malittarisassat aalajangersarneqarput, malittarisassanilu pineqartuni ilaatigut ilinniartut ilinniartut inaanni najukkaminni imigassanik aalakoornartuuteqarnissaat atuinissaallu inerteqqutigineqarput.

Kiisalu nalunaarutigineqassaaq Aasianni GU-p oktober 2011-imi ilinniarfiup imigassanut aalakoornartortalinnut tunngatillugu malittarisassaliornermut tunngavilersuutaasut ilinniartitaanermut ilisimatusarnermullu Naalackersuisoqarfimmut nassuiaateqarfiginikuugai. Tassani takuneqarsinnaavoq imigassanut aalakoornartulinnut politikkimik pilersitsinermit tunngaviusoq siusinnerusukkut Aasianni GU-mi imigassat aalakoornartullit pillugit qasungasumik politikkeqarsimanerup kingunerisimagaa atuangitsoortarnerujussuaq ilinniangitsoortarnerujussuarlu, tamatumalu kingunerisaanik ilinniartitsissutinik malinnaasinnaanikut ajornartorsiuteqarneq kiisalu tillinniarnit, nakuusernerit, nipiliornerit, aserorterinerit kiisalu inuit avataaneersut amerlasuut ilinniartut inaanniitarnat. Kiisalu qasungasumik imigassat aalakoornartortalit pillugit politikkeqarnerup nalaani politiit akulikitsumik ilinniartut inaanukartariaqartarnikuupput, eqqaamiut naammagittaalliorput, apparisanut nakuusertoqartarluni, taamatullu ineqartut allat angajoqqaallu ernumallutik saaffiginnitput, tassa toqqissisimanginneq nalinginnaasuummat.

Tamatumunnga atatillugu Aasianni GU-mit ilisimatitsissutigineqarpoq imigassanik aalakoornartulinnik toqqortaqaarsinnaaneq aqukkuminaatsuussasoq, tassami imigassat aalakoornartortalit ilinniartut inaanni imernejarsimanersut erseqqissumik uppersarneqarsinnaasannimmata. Ilanngullugulu Aasianni GU-mit ilisimatitsissutigineqarpoq malittarisassat malinneqarnersut akuttoqatinngitsumik misissuiffigineqarneq ajortut, tassami nalinginnaasumik unioqutitsinerit najugaqartut allat naammagittaalliornerisigut pisarmata imaluunniit ilinniartitsisut ilisimatitseqqaaratik pulaarnerisigut. Kiisalu oqaatigineqassaaq ataavartumik pigartoqarnissamut akissaqartoqanngitsoq.

Tassunga atatillugu Aasianni GU-mit ilisimatitsissutigineqarpoq malittarisassat maannakkut atuutilersut kingunerisimagaat ajornartorsiutinik taakkartorneqartunik annertuumik apparititsineq, tamatumunngalu ilanngullugit atuangitsoortarnerit. Tamakkua saniatigut ilisimatitsissutigineqassaaq malittarisassat pineqartut siunertarisaat anguneqarsimasutut oqaatigisariaqartoq, tassami imigassap kingunerisaanik aserorterinerit nipiliornerillu nungutinneqarsimasutut taasariqarmata, taamatullu kollegiani najugaqarluni eqqissisimanarnerulerat. Aammattaaq Aasianni GU-mit oqaatigineqarpoq taamatut aaqqiisimanerup kingunerisaanik ilinniartut soraarummernerminni angusarinnerulernissaat neriuttigineqartoq.

Aammattaaq Aasianni GU-mit nalunaarutigineqarpoq ilinniarfiup aaqqissuusaanik festernermut atatillugu ilinniartitsisut peqataaffigisaannik ilinniartut 18-inik ukioqalereersimasut immiaararsisinaanissaat periarfissaqarmat, kisiannili immiaaqqat festerfimmitt anniseriarlugit inigisanukaanneqassanngillat.

Tamakkua tunngavigalugit Aasianni GU-p ilinniartut inaat pillugit nalunaarut tunngavigalugu malittarisassanik pilersitsisinaanermik atuinermigut ilaatigut

imigassamik aalakoornartulinnik uninngassuuteqarsinnaanissamik inerteqquteqarnerata Naalakkersuisut tungaanniit uparuarnissaanut peqqutissaqanngilagut. Tamatumunnga tapiliullugu ilisimatitsissutigineqassaaq, Aasianni GU-p nammineerluni ilinniarnertuunngorniarfiup ilinniartunut iniutaani imigassamik aalakoornartulimmik atuisinnaanneq pillugu apeqqummut nammineerluni aalajangiisinnaanissamut periarfissaqarneranik allannguinnissamik Naalakkersuisut suliaqalersaanngimmata.

Naalakkersuisut matumunnga atatillugu Aasianni GU malittarisassanut tunngatilugu ilinniarnertuunngorniarfimmu pingaarnertut siunniussaanut pitsaasumik kinguneqarsimaneranik misilittagaqalerna pingaartippaat, tassami inuusuttut ilinniarnertuunngorniartut toqqissisimanarnerusumik atugaqalersimammata. Pingaartumillu inuusuttunut ukiukinnerusunut aammalu ilaqutariinnut meerartalinut aamma ilinniartut inaanni najugaqartunut tunngatillugu.

Inussiarnersumik inuulluaqqusilluta



Palle Christiansen